

O LE ATA O LE FAAOLATAGA



O LE A LE ATA O LE FAAOLATAGA?

O le **ata o le faaolataga*** o le fuafuaga lea a le Atua mo le fiasia o Ana fanau. E taula'i atu i le **Togiola** a Iesu Keriso. Afai e te mulimuli i aoaoga a Iesu Keriso, o le a e maua le filemu tumau o le loto i lenei olaga ma le olioli e faavavau pe a mavae le oti.

A o e aoao e uiga i le ata o le faaolataga, o le a e maua ia tali i fesili nei: "O fea na ou sau ai?" "O le a lo'u faamoemoega i le olaga?" O fea ou te alu i ai pe a uma lenei olaga?"

O FEA NA OU SAU AI?

E le'i amataina lou olaga ina ua e fanau mai, ma e le i'u foi pe a e oti. Ua faia oe i se tino **agaga** (o nisi taimi e ta'u ai o le agaga) ma se tino faaletino. Sa foafoaina e lou Tama Faalelagi lou

agaga, ma sa oulua nonofo faatasi ma Ia, a o avea oe o se agaga, ae e te le'i fanau mai i le lalolagi. Sa e iloaina o Ia ma sa e alofa i ai, ma sa Ia iloa foi oe ma alofa ia te oe. Ua ta'ua le taimi lena, o le **mua'i olaga**.

I lou mua'i olaga atoa, sa aoaoina oe i mataupu faavae ma poloaiga e taunuu atu ai i le fiasia. Sa tupu lou atamai

ma sa e aoao ai e alofa i le upumoni. Sa aoaoina oe e uiga i le ata o le faaolataga. I le taimi o lea mua'i olaga, sa filifilia ai Iesu Keriso e avea ma Faaola; sa e aoaoina ai foi o Ia o le a mafai ai ona e faatoilaloina aafiaga o au filifiliga sese.

"O le ata o le [faaolataga] . . . na saunia ia Keriso talu le faavaeina o le lalolagi mo i latou uma o e faatuatua i lona suafa."

Alema 22:13

*O upu lanumumu o loo faamatala atu ia uiga i itulau e 18 ma le 19.

O le aiga o le totonugalemu lea o le fuafuaga a lo tatou Tama Faalelagi.





O se vaega taua o le fuafuaga a le Atua, o lou sau lea i le lalolagi ina ia maua ai se tino faaletino ma aoao ai e faia filifiliga tonu. O le a e le manatuaina lou nofo ai i le afioaga o le Tama Faalelagi, peitai, o le a Ia tuuina atu ia te oe le tomai e te iloa ai le mea tonu mai le mea sese. O le a mafai ona e iloaina Lona alofa ma le upumoni. O ou aafiaga ma tofotofoga, o le a mafai ai ona e iloa fai e le aunoa ia filifiliga sa'o. Faatasi ai ma le fesoasoani a Iesu Keriso, o le a mafai ai ona e toe foi atu e mau faatasi ma lou Tama Faalelagi pe a uma le taimi e te ola ai i le lalolagi.

I lou mua'i olaga, sa e aoaoina ai e na o le filifili lava e mulimuli i le fuafuaga a le Atua, o le a mafai ai ona e maua le filemu tumau ma le lotomalie i lenei olaga ma le faavavau. Ona o Lona alofa ia te oe, o lea sa tuuina atu ai e lou Tama Faalelagi ia te oe le **saolotoga e filifili ai**, o le mana lea e fai ai filifiliga. Na te faatagaina oe e filifili pe e te fia mulimuli i Lana fuafuaga ma le Alii o Iesu Keriso.

O Satani, o se tasi o fanau agaga a le Atua, sa fouvale i lo tatou Tama Faalelagi ma na te le'i taliaina Lana fuafuaga. Sa manao o ia e fai faamalosi i tatou uma e faia lona loto. O le mea e faanoanoa ai, e toatele fanau a lo tatou Tama Faalelagi sa filifili e mulimuli ia Satani. Sa auina ese atu ia Satani ma ona soo mai le afioaga o le Atua, ma sa le faatagaina i latou e fananau mai i le lalolagi. O loo avea pea i latou ma ni agaga. Ua malaia i latou, ma e latou te mananao foi ina ia e malaia. Latou te faaosooso ia te oe ma fanau uma a le Atua ina ia faia mea e oo mai ai le faanoanoa ma mea e le fiafia i ai le Atua.

***E** ui lava ina ua e le manatuaina lea fuafuaga, ae e te le'i sau i lenei lalolagi sa e nofo i le afioaga o le Atua, lou Tama Faavavau, ma Lona Alo, o Iesu Keriso. Sa e alaga ma le fiafia ina ua tuuina atu ia te oe le avanoa e te sau ai i lenei lalolagi, ia maua ai se tino ma mulimuli ai i le fuafuaga a le Atua mo lou fiafia.*

*O upu lanumumu o loo faamatala atu ia uiga i itulau e 18 ma le 19.

I le mua'i olaga, sa e filifili ai e faatuatua ia Iesu Keriso ma mulimuli i le fuafuaga a le Atua. O au filifiliga, lea ua e fanau mai ai i le lalolagi. E na o le faia foi o nei lava filifiliga, e mafai ai ona e maua le filemu i lenei olaga ma mafai ai ona e toe foi atu e mau faatasi ma lou Tama e Faavavau pe a mavae lenei olaga.

O LE A LO'U FAAMOEMOEGA I LE OLAGA?

O Le Fofoaga ma le Pau

Sa foafoaina le lalolagi e avea ma se nofoaga mo fanau a lo tatou Tama Faalelagi e nonofo ai ma maua ai le potu masani. O Atamu ma Eva o ulua'i fanau a le Atua na o mai i le lalolagi. Sa la nonofo i se nofoaga e ta'ua o le Faatoaga i Etena, lea sa latou mafuta ai pea ma le Atua.

Sa tuuina atu e lo tatou Tama Faalelagi ia Atamu ma Eva le filifiliga saoloto, po o le saolotoga e filifili ai. Sa Ia poloaiina i la'ua e aua ne'i aai i le fua o le laau e iloa ai le lelei ma le leaga. O le usita'i i lenei poloaiga o lona uiga, o le a la nonofo ai pea lava i le faatoaga, peitai o le a le mafai ona la aga'i i luma e ala i lo la'ua aoaoina lea mai aafiaga ma luitau. Sa faaosoosoina Atamu ma Eva e Satani e aai i le fua ua faasaina, ma sa la filifili e fai. O le vaega lea o le fuafuaga a le Atua. O la la'ua faaiuga, na aveeseina ai i laua faaletino ma faaleagaga mai le afoaga o le Atua. Sa avea i la'ua ma tagata ua faitino, o lona uiga, ua mafai ona agasala ma oti. Sa le mafai ona la toe foi atu ia te Ia e aunoa ma Lana fesoasoani. O le tuueseina mai o i la'ua faaletino ma faaleagaga mai le Atua, ua faaigoa o le Pau.

Sa auina atu e lo tatou Tama Faalelagi agelu ma le Agaga Paia e aoao Atamu ma Eva e uiga i le ata o le faaolataga. O le totonugalemu o lenei ata po o le fuafuaga, o le Togiola lea a Iesu Keriso, lea e mafai ai e fanau a le Atua ona faatoilalo aafiaga o le Pau, ma maua ai le olioli i lenei olaga ma le faavavau.

*O upu lanumumu o loo faamatala atu ia uiga i itulau e 18 ma le 19.

*“A*na le solitulafono Atamu,
po ua le pau o ia, ae tumau pea
o ia i le faatoaga o Etena....

*“Ma ua le fanafanau foi
[Atamu ma Eva]; o lea e tumau
ai i laua i le agasala, ua leai
se olioli, aua ua le iloa se
malaia, ua le fai se lelei, aua
ua le iloa se agasala.*

*“Ae peitai faauta, ua faia
mea uma i le poto o
Le ua silafia mea uma.*

*“Na pau Atamu ina ia i
ai tagata; ua ola tagata ina
ia latou maua le olioli.”*



O Le Togiola a Iesu Keriso

E alofa lou Tama Faalelagi ia te oe, o le ala lea na Ia auina mai ai Lona Alo, o Iesu Keriso, e totogi au agasala. O lea totogi o se vaega o le Togiola a Iesu Keriso. Sa mafatia Iesu Keriso i lona lava lotomalie ona o au agasala, o ou tiga, o ou ma'i, ma ou faanoanoaga. O Lona alofa tunoa ma le alofa mutimutivale,

e mafai ai ona Ia fesoasoani ia te oe i ou tofotofoga ma aveesea mai ia te oe le ta'usalaina ma le maasiasi lea e afua mai ona o au agasala.

I le totogiina o au agasala, e le'i aveesea ai e Iesu lou saolotoga e te filifili ai po o lou tiutetauave patino—Na te le faamamaina oe pe a e le manao ai. Ina ia e mauaina Lana fesoasoani ma le malosi, e ao ia te oe ona e faatuatua

"Aua ua faapea lava ona alofa mai o le Atua i le lalolagi, ua ia aumai ai lona Atalii e toatasi, ina ia le fano se tasi e faatuatua ia te ia, a ia maua e ia le ola e faavavau."

Ioane 3:16

ia te Ia, salamo, ia papatisoina, maua le Agaga Paia, ma filifili e mulimuli i Ana aoaoga i lou olaga atoa. A e faalagolago i le Togiola, o le a e lagonaina le alofa o le Atua, ma o le a Ia fesoasoani ia te oe e onosa'ia ou tofotofoga. O le a e maua le olioli, filemu, ma le faamafanafanaga. O mea uma e foliga e le o fetau i le olaga, e mafai ona faasa'o e ala i le Togiola a Iesu Keriso ma le alofa tunoa ma le alofa o le Tama Faalelagi. O le Togiola o le totonugalemu lea o le ata o le faaolataga.

O FEA OU TE ALU I AI PE A MAVAE LENEI OLAGA?

Mai se vaaiga faaleolaga nei, o le **oti faaletino** e ono foliga mai o se i'uga lea, peitai o le mea moni lava ia, o se amataga, o se sitepu i luma i le fuafuaga a lo tatou Tama Faalelagi. O le oti, e tuua ai e lou agaga lou tino ae alu i le **lalolagi o agaga**, o se

*O upu lanumumu o loo faamatala atu ia uiga i itulau e 18 ma le 19.



nofoaga lea o aoaoga ma sauniuniga. I le lalolagi o agaga, o le a tumau pea ona e manatua mea o lenei olaga.

Aoti, ona tuua lea e lou agaga lou tino ae alu atu i le lalolagi o agaga, o se nofoaga o sauniuniga, aoaoga, ma malolo ai mai faigata ma faanoanoaga.

O le a le suia e le oti ou uiga po o lou manao mo le lelei po o le leaga. Afai e te filifili e mulimuli ia Keriso i lou olaga i le lalolagi nei, o le a e toafilemu i le lalolagi o agaga, ma o le a e malolo lelei mai ou popolega. O i latou e filifili e le mulimuli ia Iesu Keriso, ma e le salamo, o le a le fiafia.

Na silafia lava e lo tatou Tama Faalelagi e toatele Ana fanau o le a le maua se avanoa e aoao ai e uiga ia Iesu Keriso i o latou olaga, ma o isi foi o le a filifili e le mulimuli ia te Ia. Talu ai e alofa o Ia i Lana fanau, o lea na saunia ai e le Atua se ala mo i latou o i le lalolagi o agaga e aoao ai e uiga i Lana fuafuaga, ma faatuatua ia Iesu Keriso, ma salamo. O i latou e talia ma mulimuli ia Iesu Keriso, o le a maua le filemu ma le malologa lelei.

Toetu ma le Faamasinoga

O se tasi o meaalofa sili a le Atua i tagata uma e o mai i le lalolagi, o le **toetu**, lea ua mafai ona o le Togiola a Keriso. Ina ua maliu Iesu i luga o le satauro, sa alu Lona agaga i le lalolagi o agaga. I le tolu aso mulimuli ane, sa toe tuufaatasia ai Lona agaga ma Lona tino mamalu, ua faaatoatoaina, lea e le toe mafai ona oo i ai le oti. O lenei toe tuufaatasia o le tino ma le agaga ua ta'ua o le *toetu*. O tagata uma e fananau mai i le lalolagi, o le a toetutu.

A mavae ona e toetu, o le a e alu atu i luma o le Atua ina ia faamasinoina ai oe e tusa ma au galuega ma manaoga o lou loto.

**O upu lanumumu o loo faamatala atu ia uiga i itulau e 18 ma le 19.*

Sa faaali atu le Faola toetu ia Maria.



Tikeri o le Mamalu

A uma ona faamasinoina oe, o le a e ola i se tulaga o le mamalu. Ona e eseese uma galuega ma manaoga o tagata, o lea foi ua i ai malo eseese i le lagi, po o tikeri o le mamalu.

Malo Selesitila. E afifio lo tatou Tama Faalelagi ma Iesu Keriso i le malo selesitila. Afai e te ola e tusa ai ma le talalelei a Iesu Keriso, ma ua faamamaina oe mai agasala e ala i le Togiola, o le a e maua se nofoaga i le malo lenei e silisili ona maualuga. O le a e nofo i le afioaga o le Atua ma iloa ai le olioli atoatoa.

Malo Terasitila. O tagata e mumusu e talia le talalelei a Iesu Keriso, ae e ola i ni olaga faamamaluina, o le a maua se nofoaga i le malo terasitila.

Malo Telesitila. O i latou e agasala pea ma e le salamo, o le a maua se nofoaga i le malo telesitila.

O le Togiola a Iesu Keriso ua mafai ai ona maua le faaolataga.

Mua'i Olaga

Fofoaga
ma le Pau

Olaga i le Lalolagi Nei

Faatuatua ia Iesu Keriso
Salamo
Papisoga
Meaalofa a le Agaga Paia
Tumau e oo i le iuga

Oti Faaletino

O LE A LE UIGA O LE ATA PO O LE FUAFUAGA MO AU?

A e malamalama o le Atua o lou Tama, e alofa o Ia ia te oe, ma o Ia ua mafai ai ona e maua le poto masani ma le malamalama iinei ma avea ai e faapei o Ia pe a mavae lenei olaga, ua e iloa le taua o au faaiuga i lou olaga. Ua e malamalama e tataua ona e mulimuli ia Iesu Keriso, ina ia maua ai faamanuiaga atoatoa o le fuafuaga a lo tatou Tama Faalelagi.

Lalolagi o Agaga

Toetu ma le
Faamasinoga

Selesitila

Terasitila

Telesitila

E MAFAI FAAPEFEA ONA OU ILOA?

Ua oo mai se malamalama sili atu e uiga i le ata o le faaolataga talu le Toefuataiga o le talalelei a Iesu Keriso e ala mai i le Perofeta o Iosefa Samita.

E mafai ona e iloaina mo oe lava, e moni nei mea e ala i lou fesili atu i lou Tama Faalelagi i le tatalo. O le a tali mai o Ia ia

E *Faaapefea Ona Ou Tatalo?*

- *Ta'u muamua lou Tama Faalelagi.*
- *Ta'u atu i ai lagona o lou loto (o le faafetai, fesili, ma talosaga e faamautinoa mai le moni o le Tusi a Mamona ma mea sa aoao atu e faifeautalai).*
- *Ia faai'u ("I le suafa o Iesu Keriso, amene").*

te oe e ala mai i le Agaga Paia. Ua ta'ua foi le Agaga Paia o le Agaga o le Atua, ma o se tasi o Ana matafaioi o le molimau, po o le tautino mai, o le upumoni. E faaalua mai e le Agaga Paia ma faamaonia le upumoni e ala i lagona, o mafaufauga, ma uunaiga. O lagona e maua mai i le Agaga Paia e mamana, peitai e masani foi ona malu ma toafimalie. E pei ona aoao mai i le Tusi Paia, "O le fua o le Agaga o le alofa, o le olioli, o le filemu, o le onosai, o le mataalofa, o le agalelei, o le faamaoni, o le agamalu, [ma le] le gaoia" (Kalatia 5:22–23). O nei lagona o se faama-

oniga lea mai le Agaga Paia e moni lenei savali. O le a manao-mia loa oe e te filifili pe o le a e ola e tusa ai ma aoaoga a Iesu Keriso e pei ona toefuatai mai e ala mai ia Iosefa Samita.



LISI O UPU

Agaga O le vaega lea o se tagata sa ola ma le Tama Faalelagi a o le'i fanau mai. I le taimi o le olaga i le lalolagi, e tuufaatasia ai le agaga ma se tino faaletino. E faaauau pea ona ola le agaga pe a oti le tagata.

Alofa Tunoa O le fesoasoani ma le malosi faalelagi e tuuina mai e ala i le alofa mutimutivale o Iesu Keriso. O Lona alofa tunoa, lea ua mafai i Lana Togiola, o le a toetutu ai tagata uma. O Lona alofa tunoa foi, o le a mafai ai e i latou e salamo ma ola e tusa ai ma Lana talalelei, ona lagonaina se latalata mausali i lo latou Tama Faalelagi i lenei olaga ma ola ai i Lona afioaga pe a mavae lenei olaga.

Ata o le faaolataga O le fuafuaga a lo tatou Tama Faalelagi e mafai ai e i tatou ona avea e faapei o Ia ma mauaina le atoaga o le fiafia. O lenei fuafuaga e totonugalemu i le Togiola a Iesu Keriso, ma e aofia ai poloaiga uma, o sauniga, ma aoaoga o le talalelei.

Faaolataga O le laveaiina mai i le agasala ma le oti. Ua mafai ona i ai le faaolataga ona o le Togiola a Iesu Keriso. O le Toetu o Iesu Keriso, o le a faatoilaloina ai e tagata uma ia aafiaga o le oti. E mafai foi ona laveaiina mai i tatou mai aafiaga o le agasala i le faatuatua ia Iesu Keriso. O lea faatuatua e faaalua i se olaga o le salamo ma le ususitai i poloaiga ma sauniga o le talalelei ma le auauna atu ia Keriso.

Lalolagi o agaga O le nofoaga e o i ai o tatou agaga i le va o le oti ma le toetu. O i latou sa amiotonu i o latou olaga, o le lalolagi o agaga o se nofoaga o le filemu ma le fiafia.

Mua'i olaga O lo tatou olaga ae tatou te le'i fananau mai i lenei lalolagi. I lo tatou mua'i olaga, sa tatou nonofo i le afioaga o lo tatou Tama Faalelagi o Ana fanau agaga. Sa le'i i ai ni o tatou tino faaletino.

O Le Pau O le mea lea na tupu na avea ai le tagata ma tagata faitino. Na afua ai ona vavaeese mai le Atua i la le tino ma la le agaga. Talu ai ona sa le usita'i Atamu ma Eva, le uluai tagata, i poloaiga a le Atua, o lea sa vavaeeseina ai i la'ua mai Lona afioaga (e ta'ua foi lenei vavaeese o le oti faaleagaga) ma avea ai i la'ua ma tagata faitino (o lona

uiga ua mafai ona oo i ai le oti faaletino). Ona o i tatou o ni e tutupu mai ia Atamu ma Eva, o lea foi ua vavaeese mai ai i tatou mai le Atua ma mafai foi ona tatou oti faaletino. O le Togiola a Iesu Keriso ua faa-toilaloina ai le oti faaletino ma le oti faaleagaga.

Oti faaleagaga O le vavaeese lea mai le Atua ona o le le usiuitai i Ana poloaiga. E faasaoina i tatou mai le oti faaleagaga e ala i le Togiola a Iesu Keriso pe a tatou salamo ma tausii Ana poloaiga.

Oti faaletino O le tuueseeseina lea o le agaga mai le tino faitino. A oo ina oti le tino faaletino, e faaaauu ona nofo le agaga i le lalolagi o agaga. Tatou te faa-toilaloina le oti faaletino i le toetu, lea na mafai ona o le Togiola a Iesu Keriso.

Saolotoga e Filifili Ai O le meaalofo mai le Atua e filifili ai le lelei ma le leaga, o le sa'o foi ma le sese.

Sauniga O se faatinoga aloa'ia paia, e faia i le pule o le perisitua. O faataitaiga e aofia ai le papatisoga, o le mauaina o le Agaga Paia, ma le faamanatuga. O sauniga e masani lava o auala ia e ulu atu ai i osiga feagaiga ma le Atua.

Toetu A mavae le oti faaletino, ona tuufaatasia lea o le agaga ma le tino faaletino o aano ma ivi ua faaatoatoaina. O Iesu Keriso o le uluai tagata lea na toetu. A uma ona toetu, ona le toe tuueseesea ai lea o le agaga ma le tino, ma o le a ola le tagata e faavavau. O tagata uma lava e ola mai, o le a toetutu ona o le Togiola.

Togiola O le mea lea na tupu ua mafai ai ona tatou faalelei ma le Atua. Ina ia togiolaina, o le mafatia lea i le faasalaga mo agasala, lea e aveesea ai aafiaga o le agasala mai tagata agasala ua salamo. Ua na o Iesu Keriso lava e mafai ona faia se Togiola atoatoa mo tagata ola uma. O Lana Togiola na aofia ai Lona mafatia mo a tatou agasala, o le faamaliigiina o Lona toto, ma Lona maliu ma le Toetu. O le Togiola, o le a toetutu ai tagata uma sa ola mai. O le Togiola foi ua maua ai e i tatou se auala e faamagaloina ai mai a tatou agasala ma ola faavavau ai ma le Atua.

SUESUEGA FAAOPOOPO

O fesili ma mau o loo i lalo o le a fesoasoani ia te oe e te aoao atili ai i mataupu faavae o i lenei tamaitusi, ma mafaufau loloto ai i ai. E le o atoa le lisi; o faamatalaga faaopoopo ma isi mau faasino, o le a faasino atu ai oe i isi fuaitau ma punaoa faaopoopo.

O le a lo oulua sootaga ma le Atua ae e te le'i fanau mai?

Ieremia 1:5 (Tusi Paia, Feagaiga Tuai)

Eperu 12:9 (Tusi Paia, Feagaiga Fou)

O le a le Pau? Na tatau i se a ona i ai?

2 Nifae 2:14–26 (Tusi a Mamona, itulau 48–49)

Alema 42:2–9 (Tusi a Mamona, itulau 275–276)

O le a le faamoemoega o lou olaga iinei? E mafai faapefea ona aafia au faaiuga e te faia i aso taitasi, ona o lou iloa o lena mea?

2 Nifae 2:25–27 (Tusi a Mamona, itulau 49)

Alema 34:32 (Tusi a Mamona, itulau 261)

O le a le Togiola? E mafai faapefea ona fesoasoani [le Togiola] i lou olaga i aso taitasi?

Ioane 3:16–17 (Tusi Paia, Feagaiga Fou)

Roma 3:23–25 (Tusi Paia, Feagaiga Fou)

2 Nifae 2:6–8 (Tusi a Mamona, itulau 47)

Alema 7:11–12 (Tusi a Mamona, itulau 193–194)

Alema 42:22–23 (Tusi a Mamona, itulau 276–277)

O le a le lalolagi o agaga? O le a le mea e tupu iina?

1 Peteru 4:6 (Tusi Paia, Feagaiga Fou)

Alema 40:11–14 (Tusi a Mamona, itulau 272–273)

O le a le uiga o le toetu mai? O ai o le a toetu?

Aisea e taua ai le toetu?

2 Nifae 9:13–15 (Tusi a Mamona, itulau 60–61)

Alema 11:42–45 (Tusi a Mamona, itulau 204–205)

O le a le lagi? Ua i ai i se a vaega eseese o le mamalu?

1 Korinito 15:40–43 (Tusi Paia, Feagaiga Fou)

TATOU TAPUA'I FAATASI

SAU E VAAI PE MAFAI FAAPEFEA ONA FAAMANUIA
E LE TALALELEI TOEFUATAIINA LOU OLAGA



O le sauniga faamanatuga o le sauniga tapua'i autu lea. E masani lava ona silia teisi atu ma se itula lona umi, ma e masani ona aofia ai mea nei:

Viiga: E usuina e le potopotoga. (E i ai lava tusipese.)

Tatalo: E fai e tagata o le Ekalesia [i le mea o fai ai].

O le faamanatuga: E faamanuia le areto [falaoa] ma le vai ma tufatufa i le potopotoga e faamanatu a'i le Togiola a Iesu Keriso.

Failauga: E masani pe toatasi pe toalua foi ni uso o le potopotoga e tofi a o le'i oo i le aso, e lauga i autu o le talalelei.

Ofu: O alii ma tama talavou e masani ona fai o latou suti po o se ofuvae lelei foi ma se ofutino ma le fusiua. O tamaitai ma teine e fai o latou ofu lelei.

E le talosagaina ni foa'i tupe i le taimi o sauniga.

Matou te valaaulia foi oe e te auai i isi sauniga faaopoopo, e tusa ai ma le mea e te fiafia i ai ma le matutua o tagata. O le faatulagaga ma le i ai o nei sauniga po o fonotaga, e ono eseese.

Aoga Sa: O vasega ia e suesue ai tusitusiga paia ma aoaoga faavae o le talalelei.

Fonotaga a le Au Perisitua: O vasega mo alii ma tama talavou ua ta'i 12 tausaga ma luga atu.

Aualofa: O vasega mo tamaitai ua ta'i 18 tausaga ma luga atu.

Tamaitai Talavou: O vasega mo teine ua ta'i 12 tausaga i le 18.

Peraimeri: Tapua'iga faavaega ma vasega mo tamaiti ua ta'i 3 i le 11 tausaga le matutua. E masani foi ona i ai se vasega pepe mo tamaiti ua ta'i 18 masina e oo atu i le 3 tausaga le matutua.



Taimi o le lotu faamanatuga: _____

Tuatasi o le falelotu: _____

O Le A Se Mea e Tatau Ona Ou Fai?



- *Faitau le Tusi a Mamona.*

Faitauga fautuaina: _____

- *Tatalo ina ia iloa e moni mea sa aoao atu e faifeautalai.*

- *Alu i le lotu.*

- *Sauniuni e papatiso i le aso* _____

- *Asiasi i le www.mormon.org e aoao atili ai e uiga i le fuafuaga a le Tama Faalelagi mo Lana fanau.*

- *Faaauau pea ona talanoa ma faifeautalai e aoao atili ai e uiga i upumoni na toefuata'i mai e le Atua e ala mai i perofeta o ona po nei.*

O le isi aso e feiloai ai: _____

Igoa o faifeautalai ma le numera o le telefoni:

O LE EKALESIA A
IESU KERISO
O LE AU PAIA O ASO
E GATA AI

www.mormon.org

Tala o Ata

Faavaa i luma: Faamatalaga mai le *Ua Toetu o Ia*, saunia e Del Parson
© Del Parson. Aua ne'i kopiina
Itulau 11: Faamatalaga mai le *O Keriso i Ketesemane*, saunia e Harry Anderson
Itulau 13: *Ua Toetu o Ia*, saunia e Greg Olsen. © Greg Olsen. Aua ne'i kopiina
Itulau 3, 4, 6, 17, 22, 23 saunia e Steve Bunderson

SAMOAN



4 0201149890 4

01149 890